



朝陽縣志卷二十三

忠義

朝陽地處塞垣山川秉剛強之正氣人品表卓犖之奇行生其間者豪俠本乎天性忠勇出於真誠故雖文弱學士樸懦農夫事機所迫皆足以殺敵致果奮不顧身若而人者非惟地方之保障抑亦國家之干城也其人雖遙英靈宛在謹搜而集之志忠義

林墨翰縣南二十里林家窪人邑庠生

劉純熙縣東北十里三岔口人附貢生

王義廷本城人邑庠生 朝陽蒙漢雜處良莠不齊鄉

間賭棍土匪往往乘機作亂同治十四年冬月叛民

王仲元糾衆千餘人圍攻縣城地方官創辦鄉團以

林墨翰劉純熙王義廷爲團長督率鄉兵分門扼守

晝夜巡邏奈賊勢洶湧寡不敵衆拒戰兩日林墨翰

中彈身亡劉王兩團長亦被擒殞命團勇殉是難數

十人亂平大吏上其事三團長奉旨以雲騎尉世襲

三世後襲恩騎尉罔替於城內特建昭忠祠立木主

春秋致祭殉難團勇皆附焉

鄧雲成字萊峰邑庠生爲人急公好義遇有鄉里公益之事率皆攘臂行之前清光緒二十五年賊匪蜂起淫掠倍至二十六年尤甚先生目擊時艱集合村衆購置火槍壁壘拒守所居上臥佛頭溝一村得免於患由是鄰村仿效互相結合鐮子溝聯庄會遂以成立而風動一時數十里之外亦多從之者是年七月七日義和團自縣街南來攻松樹咀子教堂住於二十家子東南溝大屯等處將數村火槍逼借一空及義和團失敗遺失槍枝被教民拾去見其上均記有

槍主姓名遂遷怒於會衆於九月九日僱俄國兵攻東南溝村男女老幼死於是難者計五十餘人其最可慘有母已死而子尙食乳者先生此時即欲糾衆往援不與同履斯土終以事關國際交涉未敢妄動十二日教堂復率兵攻二十家子居民聞風逃避未得逞其殺戮遂縱火燒關帝廟永慶當聚德源及民戶十餘家先生憤恨不平仍未敢妄動十五日攻朝陽縣城商民之損失不堪言狀即監獄亦被釋放返松樹咀子後即佔據二十家子東南溝稗子溝等處

所有文契粮石物產均被勒去斯時各村居民幾同波斯朝鮮而猶不足又按地索捐進佔鐮子溝等處先生忍無可忍乃集合會衆誓死抵拒擇要扼守晝夜不懈教堂以吞食未遂於十月初三日率兵八千餘人攻鐮子溝連庄會先生親冒石矢率衆死戰自黎明激戰至日夕教堂之兵始退而亦未敢窮追計是役會衆死者五六十人下臥佛頭溝黃姓死者佔三分之一敵兵死傷若干不得其詳教堂擄去會首翟文一人會衆擄得教民張宏友郭永二人此後彼

此雖按兵不動而教堂所佔村莊及勒去之文契糧石盡數退還未始非先生之力也而死機亦伏於是教堂以不得逞於民同乃挾勢向國家交涉前清以新敗之餘抵抗無力二十八年四月初八日遂令直隸提督馬玉崑辦理此案馬曾宣言已交涉成熟互相賠償損失互相釋放所擄之人教堂所賠之款存於二十家子聚德源以備分領會衆所放之卡亦當撒去云云先生遵行去後忽於十月十三日馬玉崑率毅軍前來剿辦連莊會先生與弟雲祥及其少子

在清河門被執慷慨就戮嗚呼先生身雖死而其爲國爲民之心有足多焉使幸生斯世當不讓革命諸先烈專美也其同時被戮者有王福太成義王福春成迎春諸人

杜郁藩居梅勒營子河東充本區第二分所巡長民國九年三月有黑龍江人名費鴻携銀洋千餘元奉票千餘元來朝陽爲子聘妻寄頓孫姓家寅夜被火賊盡數搶去訪實赴該分所指名報告杜巡長率勇獲賊四人搜出贓証送縣正法又民國十一年二月饒

頭營子徐家被賊綁去三人杜郁藩聞報在梅勒營子東溝設卡邀擊已斃匪首猶欲窮追不料未加隄防被賊還擊殞命縣詳省憲奉令在本鄉立碑旌表並發給金色獎章

劉文德居縣東北亂脖子溝民國十五年舉充本牌保長經保甲王所長調擊票匪奮不顧身被賊槍擊殞命忠義可嘉聞者哀之

賈鴻賓居縣東北兩家子村民國十六年票匪大起民不聊生紳商聯名保舉爲該區練總時值巨匪柳芳

聚衆百餘人佔據太子山警甲二百餘人圍守數日  
無策可進警察孫所長調賈練總進擊該練總奮不  
顧身循山麓而上匪蜂湧抵禦交戰不逾時即中彈  
殞命於太子山西坡鄉人聞者感其忠義咸痛惜之  
徐崑字玉生縣南鏵子溝人昆仲六人公行四生而儀  
容偉傑面黑有光幼即英毅不羣壯年營業田畝忽  
毅然棄其故業荷戈從軍一旦得伸壯志果勇往無  
前歷著勛績十餘年累擢至馬軍統領隸左提督官  
庭麾下甲午秋隨元戎征日本各軍皆敗退公獨與

左帥力扼平壤苦戰三日左右有勸退者輒以手槍

擊之卒隨左帥戰沒於平壤城下清廷褒嘉輿論亦

深惜之當時有悼以詩者附列於後

海畔妖氛障碧  
雷英雄環甲擁

征鏖旗摧兵逐烟塵散破響魂隨雨彈飄生入玉門

空有願死拋金鼓太無聊殘骸欲覓終難覓火藥薰

蒸面久焦倭艦形形下海濤將軍拒敵氣偏豪半

生籌畫勞心血一命輕拚等羽毛子弟猶衝新壁壘

家人已燬舊弓刀英靈不肯隨風散尙待朝廷錦字

褒笳鼓悲鳴夕照殘愁雲黯黯劍光寒牙旗臥處

噴紅雨寶馬歸來帶繡鞍屈指數齡纔耳順用軀爲

國自心安乍聞凶耗羣驚訝洒淚如珠衆共彈

寶德全字子瑞本縣人土默特右翼旗台吉貴族也義

俠敢爲壯年落魄家居鬱鬱不得志時值武衛軍駐

朝防剿毅然仗劍投効趙統領爲馬兵平匪立功提  
升武弁及趙統領爲河南督軍隨從進攻白狼悍匪  
時已由團長而旅長獨當一面故大河兩岸青犢黃  
麋紅巾白帶一掃而平之拔生靈於水火救塗炭於  
城鄉造福汴梁至今受其惠者歌功頌德口碑載道  
事平荐授歸德鎮守使民國十一年南北構兵之際  
調赴汴省幫辦軍務甫入城流言陷入嫌疑案內公  
尙不知倉猝被害國人冤之前在鎮軍任內曾輦金  
數萬賑桑梓災難飢趨者咸慶更生公生前造無疆

之福死後垂不朽之名是爲蒙古中所特出者

王恕字佩卿縣東九十里土寶營子人以勇於任事本鄉舉爲團練會練長光緒十七年十月教匪倡亂縣城失守鄉間亦多被蹂躪縣東有匪衆數百王調集鄉團擊之追捕至長臯燒鍋被匪圍困戰二日不能解賊匪愈聚愈衆王謀率勇突圍出甫出門被賊擊斃其兩侄從之俱死鄉人念其忠義求廩生林商山撰文勒碑以誌之碑文附誌於後

嘗聞古語云殺身成仁克稱志士舍

生取義乃爲完人而自古及今鮮有能盡斯道者則以生死之間真心易改危亂之際大節難全是以貪

生畏死比比皆然忘身殉難寥寥無幾也吾鄉有王  
君行七名恕字佩卿幼者即勇毅剛強雖讀書無多  
而深明大義家非巨富而勇於輕財且嘗排難解紛  
於鄉鄰推恩施舍於親友以故遐邇老幼莫不稱頌  
焉不幸光緒十七年十月值教匪倡亂蹂躪民生公  
與其侄等督率勇丁晝擊夜巡民夫効命塞旗斬巨  
醜類寒心猶欲直搗賊穴掃清醜類詎意深入長阜  
寶泉湧重地群賊蟻聚蜂屯四外圍困公猶力戰終  
日槍斃多賊卒亦身被重傷命歸不測矣嗚呼若斯  
人者誠不忍其泯沒無彰已也今公去世已歲屆三  
周縱不能建祠塑像俎豆常新謹勒碑  
刻銘誌其生平之大概以示不忘云爾

高振斗縣東南七道嶺人性豪俠好管鄉間不平事有  
五子志趣與乃父相同所居爲鄉鎮有大小商號十  
餘家每逢集市日期小商販雲集交易故平時常設

連庄會以巡查盜賊高董其事民國十一年北南構兵有潰軍出口者沿途劫掠無復紀律猝至嶺鎮高與諸子聚衆守禦交戰半日及潰兵攻入鎮獲高父子四人先斃其父頗有赦其子意因三子大罵不絕遂同遇害鄉人惜之

白文繡字漢章居二道溝蒙人也幼尙氣俠創數牌聯莊會剿匪保鄉清季獎六品軍功由巡弁升爲路董擊匪殞命國人惜之曾捐資創本村小學校加惠子弟尤厚焉

朝陽縣志卷二十四

人物

古人以立德立言立功爲三不朽以其流風所播可  
爲傳人也顧志乘所載門類攸分其文治武功卓卓  
可傳者多半身履仕途已錄入仕宦一門未便重登  
他如鄉黨自好之士或矩步方行確遵聖賢遺訓或  
並不讀書而言信行果硜硜自守皆足以廉頑立懦  
而激厲風俗合裒錄之並附以孝友耆壽志人物  
鹿椿慶字壽堂山東名諸生學問弇博性情耿介遊學

來朝陽有相知者爲誦館穀口講指畫誨人不倦爲  
文尤利小試青年英敏者一經教導臨場拔前茅掇  
芹香即易如拾芥以故負笈從遊者駢肩累迹門牆  
時有人滿之患館於城南大來店關帝廟中者二十  
餘年先生於教授之外如時事平陂家人生理絕口  
不言束修所積漸致豐盈亦不以爲意門弟子代爲  
治產業建居室於城南小波羅赤村續婚安家先生  
至此始無東歸之志世居於此焉孺人某氏生子四  
長名廣祚積學有得餘子亦皆耕讀相安克守正業